



## 打風時

金金个日頭，晒到人頭暈腦脹，外背个馬膠路像人會熔忒樣，「還熱！還熱！」這係心肝肚唯一個感覺。食飽晝，大家回屋肚，毋敢出去，哪(naiˊ)位恬索索仔，佢乜熱到昏哆哆仔，坐在胖凳頂，電扇隆隆滾響，目珠強強就會密下去，睡下當晝，係熱天最大个享受。

「並拚！並拚！」山崩地裂个響聲，一下就摻佢个目睡鬼嚇走，仰般眨下目定，大地就變色咧，金惹惹个日頭毋見忒，換下來个係天烏地暗，雷公響無停。「愛打風時哩！」心肝堵堵恁樣胚，水點就像細石牯樣墜等下來，黏皮，屋頂像有千萬大兵行軍；屋外像有萬人樂隊演奏，聲哨驚人。

熱天下晝个風時水，來著盡遽、盡大，最驚个係禾埕晒有穀，天一暗，阿爸、阿姆、阿叔、阿姪起腳花走到禾埕，拉盪耙儕拉盪耙；掃穀儕掃穀；遮水衣布儕遮水衣布，摻水走相追，就驚穀涿著水，該就做白工哩！細人仔也無好閒，愛煞煞摻屋背晒个衫褲收落屋來。大人細子緊緊拚拚、無閒直掣，就為著一陣風時水。

風時水盡生趣，時時會堵著人在上夫田寮，看著落大水煞煞走，無想著走到下夫田，還本本出大日頭；下把仔，還會緊落水、緊出日頭，細人仔看著這種日頭水，長下一頭拍手、一頭喊：「日頭水，晒死鬼！」感覺盡奇妙，像這恁樣个情形，愛打風時正會有。風時水還有一隻特點，來得遽、去也遽，成點鐘水就停咧，落了水後，樹特別青、路特別淨、翕熱个天也變到涼爽，在該無冷氣个時代，暗晡頭就特別好睡。

這下，時代進步，氣象報告盡準，幾時會打風時、水落幾大，天氣預報到清清楚楚，儕儕做得做好準備。尤其，耕種人毋使晒穀，大家出門有車好坐，家家戶戶又有冷氣，打風時毋打風時，嘎變到無恁要緊咧。

作者：張美容

### ☆詞彙學習☆

【打風時】daˊ fungˊ shi：下雷陣雨。

【馬膠路】ma ga lu+：柏油路。

【恬索索仔】diamˊ sog sog er：寂靜無聲的樣子。

【昏哆哆仔】fun de de er：昏沉沉的。

【並拚】binˊ biangˊ：此處形容雷聲。

【目睡鬼】mug shoi+ guiˊ：瞌睡蟲。

【胚】poiˊ：揣想、猜測。

【黏皮】ngiam pi：馬上、即刻。

【起腳花】hiˊ giog faˊ：拔腿邁步。

【盪耙】tongˊ pa：晒穀用丁字耙。

【上夫田】shong+ fuˊ tien：上畝田。

### ☆文法學習☆

【哪位】naiˊ vui+：到處。此詞彙常因讀音不同而有兩義：

1. 哪位 nai+ vui+：哪裡。如：你戴在哪位？（你住在哪兒？）

2. 哪位 naiˊ vui+：到處。如：這種水果，哪位就買得著。（這種水果，到處都買得到。）